

AUGLÝSING

um rafverktakaleyfi.

Skilyrði og skilmálar til að öðlast rafverktakaleyfi á orkuveitusvæði rafveitu.

1. gr.

Skilgreining.

Rafverktakaleyfi veitir heimild til rafverktakastarfsemi á orkuveitusvæði rafveitu, og tekur það til alls þess, er snertir setningu tækja og búnaðar til dreifingar orkunnar, innan húss eða utan, og til hagnýtingar hennar, svo og til hvers konar breytinga eða viðgerða á veitum, tækjum þeirra og búnaði. Sá, sem hefur á hendi forstöðu fyrir verkum á þessu sviði, nefnist rafverktaki. Þeir, sem rafverktakaleyfið veita, verða hér eftir nefndir leyfisveitendur.

2. gr.

Gildistími.

Rafverktakaleyfi er veitt til takmarkaðs tíma, eða þar til ártalið stendur á heilum tug og getur þannig í hæsta lagi gilt til 10 ára í senn, en þá skal sækja um endurnýjun þess eigi síðar en hinn 1. september það ár, en framlenging þess miðast við 1. desember sama ár. Hafi rafverktakaleyfið t.d. verið veitt á árinu 1980, skal sótt um endurnýjun þess hinn 1. september 1990 til 1. desember 2000. Sæki maður um rafverktakaleyfi t.d. á árinu 1988, skal einnig sótt um framlengingu þess í fyrsta skipti hinn 1. september 1990, en framlenging þess gildir frá 1. desember 1990 til næstu 10 ára o.s.frv. Þó skal við gildistöku þessara skilyrða og skilmála sækja um endurnýjun allra rafverktakaleyfa, sem veitt voru samkvæmt fyrri skilyrðum.

3. gr.

Umsókn um rafverktakaleyfi.

Umsókn um rafverktakaleyfi skal send rafveitu eða sérstakri leyfisnefnd, sbr. eftirfarandi:

Þar sem orkuveitusvæði þriggja eða fleiri rafveitna er gert að einu rafverktakasvæði skal skipa sérstaka rafverktakaleyfisnefnd. Skal hún skipuð rafveitustjórum eða formönnum rafveitunefnda á orkuveitusvæðunum, einum manni frá hverri rafveitu. Að jafnaði tilnefnir stærsta rafveitan formann. Fari svo, að fjöldi nefndarmanna í leyfisnefnd sé jöfn tala skal formaður nefndarinnar hafa tvö atkvæði.

Þar sem orkuveitusvæði tveggja rafveitna er gert að einu rafverktakasvæði geta þær gert með sér sérstakt samkomulag um fyrirkomulag mála.

Umsækjandi skal vera fjár síns ráðandi og með umsókninni skal fylgja:

1. Hlutaðeigandi leyfisbréf til rafvirkjunarstarfa, útgefið af Rafmagnseftirliti ríkisins.
2. Sakavottorð.
3. Umsögn rafverktakafélags á leyfissvæðinu eða LÍR.
4. Vottorð um þá þekkingu á verslun, sem leyfisveitandi tekur gilda.

Leyfisbréf skal undirritað af rafveitustjóra. Verði sérstök leyfisnefnd skipuð, skal leyfisbréfið þó vera undirritað af formanni og ritara nefndarinnar.

Greiða skal gjald kr. 25 000,00 við útgáfu leyfisbréfs. Við endurnýjun rafverktakaleyfis, sbr. 2. gr., skal rafverktaki greiða kr. 2 500,00 ef sótt er um endurnýjun innan tilskilins tíma, ella greiðast kr. 25 000,00. Gjöld þessi breytast í samræmi við 4. gr. og nemi það fyrri 10% en það síðara 1% af því gjaldi, sem nefnt er í henni, eins og það er á hverjum tíma.

4. gr.

**Skilyrði til þess að öðlast almennt verktakaleyfi til starfa við lágspennuvirki,
B-rafverktakaleyfi.**

Til þess að öðlast rafverktakaleyfi til rafverktakastarfemi við lágspennuvirki, skv. 1. grein, skal umsækjandi:

1. Hafa hlotið B-löggildingu Rafmangseftirlits ríkisins.
2. Hafa fyrirtæki sitt staðsett og skrásett á verktakasvæðinu. Vinnustofa hans skal hafa síma, sem rafverktaki eða fullgildur fulltrúi hans svarar daglega á tilteknum auglýstum tíma, og vera búinn nauðsynlegum mæli- og prófunartækjum svo og þeim verkfærum, að hann geti starfrækt fyrirtæki sitt á viðunandi hátt, skv. nánari fyrirmælum, er leyfisveitandi setur.
3. Leggja fram tryggingarfé í óbundinni bankabók, er nemi kr. 250 000,00. Framangreind fjárhæð miðast við vísitölu byggingarkostnaðar, sem gildir 1. janúar 1988. Tryggingarfjárhæðin hækkar síðan eða lækkar í hlutfalli við byggingarvísitölu á 2ja ára fresti.

Í stað tryggingar skv. framanskráðu getur rafverktaki innt af hendi tryggingu í gegnum Tryggingarsjóð Landssambands ísl. rafverktaka (TLÍR) sem stofnaður hefur verið fyrir allt landið með samningi milli Sambands íslenskra rafveitna (SÍR) og Landssambands íslenskra rafverktaka (LÍR).

5. gr.

**Skilyrði til þess að öðlast almennt rafverktakaleyfi við háspennuvirki,
A-rafverktakaleyfi.**

Rafverktakaleyfi til verktakastarfsemi við lágspennu- og háspennuvirki geta þeir einir hlotið, sem:

1. Hafa hlotið A-löggildingu Rafmagnseftirlits ríkisins.
2. Leggja fram tryggingarfé er nemi kr. 500 000,00 er breytist í samræmi við vísitölu byggingarkostnaðar sbr. 3. tölul. 4. greinar.
3. Uppfylla önnur skilyrði í 4. grein.

6. gr.

Skilyrði til þess að öðlast önnur takmörkuð rafverktakaleyfi.

Um þessi leyfi gilda sömu tryggingarákvæði og í 4. og 5. gr. eftir því sem við á.

C-rafverktakaleyfi til að starfa við raforkuvirki í nafni fyrirtækis eða stofnunar, sem rafverktakinn ber þá tæknilega ábyrgð á, enda uppfylli hann þau skilyrði, sem fram eru sett í 1. tölul 4. gr. eða 1. tölul. 5. gr. hér að framan. Fyrirtækið eða stofnunin, sem rafverktaki ber ábyrgð á, sér um allar aðrar skuldbindingar, þar með taldar fjárhagslegar, í sambandi við störfin. Rafverktaki sannar, með skriflegri yfirlýsingu frá ráðamönnum fyrirtækisins, fullt athafnafrelsi sitt innan fyrirtækisins til að standa við skuldbindingar gagnvart rafveitu.

D-rafverktakaleyfi til starfa við sérstæð raforkuvirki, sem skilgreina skal í hverju tilviki fyrir sig, hver eru t.d. við neonljósvirki, uppsetningu á lyftum og lyftubúnaði, við röntgentæki eða þess háttar, sbr. gr.1.5.7. í reglugerð um raforkuvirki nr. 264 frá 31.des. 1971, sbr. breytingu í reglugerð nr. 185/1984.

E-rafverktakaleyfi til starfa við raforkuvirki innan vébanda einstakra fyrirtækja eða stofnana, þó að þessir aðilar stundi ekki rafvirkjun, en þá skal rafverktakaleyfið aðeins ná til starfa á athafnasvæði og/eða í húsnæði aðila.

F-rafverktakaleyfi. Rafverktaki, sem hefur hlotið eitthvert framanritaðra leyfa, A, B eða C, á einu rafverktakasvæði getur gegn vottorði þar um og með sérstakri umsókn til viðkomandi rafveitu fengið leyfi til að setja á stofn útibú á öðru orkuveitusvæði. Þarf hann þar að uppfylla hin almennu skilyrði um verkstæði og mælitækjabúnað og tryggingu eins og þau eru sett fram í 4. gr. Skal fullgildur staðgengill hans vera í útibúinu.

G-rafverktakaleyfi. Rafverktaki, sem hefur hlotið eitthvert framangreindra leyfa, A, B eða C, á einu rafverktakasvæði, getur gegn vottorði þar um og skráningu hjá viðkomandi rafveitu tekið að sér einstök opin útboðsverk á öðru rafverktakasvæði. Þarf hann að koma sér upp á því svæði nægjanlegri aðstöðu að mati viðkomandi rafveitu til að sinna verkinu svo fullnægjandi sé.

H-rafverktakaleyfi. Leyfisveitanda er heimilt að veita leyfi til einstakra verka, ef aðstæður gera slíkt nauðsynlegt. Má hér nefna:

1. Sérþekkingar er þörf.
2. Rafverktakar á orkuveitusvæðinu geta ekki sinnt fyrirbyggjandi verkefnum að mati leyfisveitanda.
3. Flutningur einingahúsa milli rafverktakasvæða og tenging þeirra við dreifikerfi leyfisveitanda.

Leyfisveitandi skal þó áður leita umsagnar Landssambands ísl. rafverktaka.

Með tryggingar fyrir slíkum leyfum skal fara þannig, að fyrir hvert einstakt verk sé lögð fram full trygging í óbundinni bankabók eins og hin almenna trygging er hæst á þeim tíma.

Tryggingarféð ásamt áunnum vöxtum endurgreiðist, þegar fullnaðartenging hefur farið fram og gallar, sem kunna að koma fram við úttekt, hafa verið lagfærðir.

Í stað áður nefndrar tryggingar getur komið tryggingaryfirlýsing frá Tryggingarsjóði LÍR.

7. gr.

Starfsemi rafverktaka.

Eitt og sama fyrirtæki getur aðeins haft einn rafverktaka í sinni þjónustu, og skal hann hafa að aðalstarfi forstöðu fyrirtækisins og/eða starf við það.

Deildarskipt fyrirtæki með 30 starfsmenn eða fleiri getur þó fengið heimild fyrir tveim rafverktökum, enda sé um ótvíræða verkefnaskiptingu milli þeirra að ræða, t.d. nýbyggingardeild og viðhaldsdeild.

8. gr.

Reglur og fyrirmæli.

Rafverktaka ber í störfum sínum að fylgja reglugerð um raforkuvirki og hlíta fyrirmælum hlutaðeigandi rafveitu.

9. gr.

Tryggingarfé.

Sé rafverktaki tryggður gagnvart rafveitu með aðild að TLÍR fer með tryggingarfé og endurgreiðslu þess eins og fyrir er mælt í samþykktum TLÍR, samnings milli SÍR og TLÍR um það efni og ákvæðum þessarar greinar.

Um meðferð og endurgreiðslu tryggingarfjár þeirra sem utan TLÍR standa gildir eftirfarandi:

Meðferð.

- a. Tryggingarfé skal lagt á sparisjóðsbók á nafni leyfishafa. Bókin geymist í vörslu leyfisveitanda. Vextir leggjast við höfuðstól og eru úttektarkræfir við endurnýjun rafverktakaleyfis sbr. 2. gr.
- b. Leyfisveitanda er heimilt að ráðstafa tryggingarfénu til að bæta úr ágöllum á veitu, er rafverktakinn hefur tilkynnt til úttektar, hafi hann ekki bætt úr þeim innan tilskilins tíma, og tjóni, sem hann kann að valda rafveitunni.

- c. Grípi leyfisveitandi til slíkra aðgerða, ber rafverktaka að endurgreiða þann hluta tryggingarfjárins sem ráðstafað hefur verið, og skal það gert innan mánaðar frá tilkynningu þar um, ella fellur rafverktakaleyfi hans úr gildi sbr. 11. grein.

Endurgreiðsla.

Tryggingarfé endurgreiðist:

- Ef rafverktaki hættir störfum að eigin ósk, og ber honum þá að tilkynna það leyfisveitanda skriflega.
- Ef rafverktakaleyfi hans fellur niður sbr. 10. gr.
- Ef hann er sviptur rafverktakaleyfi sbr. 11. gr.
- Við fráfall hans.

Tryggingarféð endurgreiðist 12 mánuðum síðar ásamt vöxtum að frádreginni þeirri fjárhæð sem kynni að hafa verið ráðstafað.

10. gr.

Niðurfelling rafverktakaleyfis.

Rafverktakaleyfi ber að fella úr gildi:

- Ef Rafmagnseftirlit ríkisins sviptir rafverktakann löggildingu sinni.
- Ef hann hættir störfum að eigin ósk, sbr. 9. gr.
- Ef hann hættir að hafa að aðalstarfi rafverktakastörf á eigin ábyrgð sbr. 7. gr og/eða hefur störf hjá öðrum, eða ef hann hættir störfum hjá þeim, sem rafverktakaleyfi hans er bundið við, sbr. 6. gr.
- Ef hann sækir ekki um endurnýjun rafverktakaleyfis sbr. 2. gr.
- Ef hann greiðir ekki viðbót við tryggingaraféð, sbr. 9. gr.
- Ef bú hans er tekið til gjaldþrotaskipta.
- Við fráfall hans.

Leyfisveitanda er skylt að kanna, hvort beita skuli framannefndum ákvæðum þessarar greinar, ef hann fær um það skriflega tilkynningu frá stjórn rafverktakafélags svæðisins, að rafverktaki uppfylli ekki lengur sett skilyrði.

11. gr.

Svipting rafverktakaleyfis.

Leyfisveitandi getur svipt rafverktaka rafverktakaleyfi:

- Ef hann hlítir ekki fyrir mælum rafveitu og/eða brýtur reglugerð hennar.
- Ef hann sýnir ítrekað óvandvirkni í starfi sínu.
- Ef hann vanrækir starf sitt og skyldur gagnvart viðskiptavinum rafveitunnar.

Leyfisveitanda er þó skylt að veita honum áminningu áður og gefum honum kost á að bæta ráð sitt.

Vilji rafverktaki ekki hlíta ákvörðun leyfisveitanda, er honum heimilt að áfrýja henni til fulltrúa stjórnar SÍR og LÍR, er komi sér saman um oddamann.

12. gr.

Breytingar.

Breyti leyfisveitandi skilyrðum þessum, er rafverktaki skyldur að hlíta þeim breytingum.

13. gr.

Undirskrift rafverktaka.

Rafverktaki skal með undirskrift sinni á sérstakt eyðublað skuldbinda sig til að hlíta í einu og öllu skilyrðum þessum svo og fyrirmælum og reglugerð rafveitunnar.

Reglur þessar um löggildingu rafverktaka hafa eftirtaldar rafveitur samið og samþykkt sem sjálfstæðan viðauka við reglugerðir þeirra um þetta efni:

Hitaveita Suðurnesja, gr. 1, reglug. nr. 365/1985.

Rafmagnsveita Reykjavíkur, gr. 7, reglug. nr. 451/1977, sbr. br. nr. 476/1983.

Rafmagnsveitur ríkisins, gr. 8, reglug. nr. 112/1968 með síðari breytingum.

Rafveita Akraness, gr. 7, reglug. nr. 40/1948.

Rafveita Akureyrar, gr. 7, reglug. nr. 458/1979, sbr. br. nr. 96/1968.

Rafveita Borgarness, gr. 7, reglug. nr. 39/1948.

Rafveita Húsavíkur, gr. 7, reglug. nr. 470/1979, sbr. br. nr. 117/1985.

Rafveita Hveragerðis, gr. 7, reglug. nr. 125/1947.

Rafveita Reyðarfjarðar, gr. 7, reglug. nr. 15/1979.

Rafveita Sauðárkróks, gr. 7, reglug. nr. 8/1950.

Rafveita Selfoss, gr. 10, reglug. nr. 448/1985.

Rafveita Siglufjarðar, gr. 7, reglug. nr. 62/1949.

Rafveita Stokkseyrar og Eyrarbakka, gr. 6, reglug. nr. 8/1925 og gr. 3, reglug. nr. 11/1940.

Rafveita Vestmannaeyja, gr. 7, reglug. nr. 117/1949.

Orkubú Vestfjarðar, gr. 19, reglug. nr. 192/1979.

Rafveita Hafnarfjarðar, gr. 7, reglug. nr. 177/1939, sbr. br. nr. 268/1969.

Reglugerðarviðauki þessi, um skilyrði og skilmála til að öðlast rafverktakaleyfi á orkuveitsvæðum þessara rafveitna, staðfestist hér með, samkv. 24. gr. laga nr. 58/1967, til að öðlast þegar gildi og birtist til eftirbreytni öllum, sem hlut eiga að máli.

Iðnaðarráðuneytið, 9. september 1988.

Friðrik Sophusson.

Páll Flygenring.

GJALDSKRÁ

fyrir heilbrigðiseftirlit á Vestfjörðum.

1. gr.

Af eftirlitsskyldri starfsemi á svæði heilbrigðiseftirlits á Vestfjörðum, er sveitarstjórn um heimilt, samkvæmt lögum nr. 109/1984 um hollustuhætti og heilbrigðiseftirlit, ásamt síðari breytingum, og heilbrigðisreglugerð nr. 45/1972, að innheimta gjöld svo sem greinir í gjaldskrá þessari.

2. gr.

Eftirlitsskyldum fyrirtækjum skal skipt í 6 flokka eftir gerð og umfangi þeirra í samræmi við fylgiskjal með gjaldskrá þessari.